

# 3 Yohanes

## Yohanes arye, winilye ning sekeipsuk yupu

Abuku sekuk deiyoknye bira, Yohanes ulamuk. Asurat ara, elce winilye ning sekuk surat ati ara, abuku si ara, 3 Yohanes nyanyabe. Yohanes ara, Yesus arye, wipdeibuk mapu, sik 12 nang kan-kan ton ulamuk. Yohanes arye, asurat ap, bitinye ning tonap, sekuka, asurat winilye ning ara, el si sekuk. Asurat ara, winilye ning sekdeibuk.

Tonda, Yohanes arye, Injil Yohanes ap, buku Wahyu ap, sekdeipsuke. Yohanes ara, Asia tam noutamak peterepra balamukce, Efesus mutuku ton binmoka anya arye, asurat ara, Asia tam noutamak bukni, Efesus mutuku ulamuk talak arye, sekuka dopdeibuk ura, Asia tam ninye dobuka balamikba, elilamik.

Yohanes arye, surat bitinye ning deice arye ayupu sekuka anya arye, Asia tam ninye arye, winilamik. Winilamik bukni, ton talak ara, Yohanes arye, dopdeibuk ura, Yesus ninye lyen yupu peteren nang, tonok mutuku peterepra biyikba, amutuku nang arye, ‘Tilila yupu peterena nang do?’ tenen, batakikce, kum melilamik. “Anang kum melipnamabe,” nyabuk deiyoknye el si ara, Dioterepes ulamuk. Dioterepes ara, malinye ulamuka anya arye, Yohanes arye dopdeibuk ura, peteren nang ati, melibik ninye babye, batakukce, “Nun Allah yupu aik wekna meme,” nyabuka yakwetebuk. Winibuk bukni, yuknye, el si ara Gayus, elce Yohanes arye, dopdeibuk nang melibuka anya arye, Yohanes arye, Gayus ati, “El teleb winibuke,” nyabuka sekuk.

---

### Yohanes arye, ‘Telebe’ nyana ati, nyabuk yupu

<sup>1</sup>Na ara an deiyoknye Yohanes arye, na ka Gaius ati yupu seknukine. Allah el yupu dib tenebuka talinirye, an ti kanye delikunune. <sup>2</sup>Na kwito, Allah diba tenepluma ati, an talima ap, an kanye ap, teleb-teleb kibuka ukilye touk, ‘An nong babye kipe lopdop asa uminye ura, aning-aning nirya teleb kibuka wininamyam’ tenen, Allah morona uk unune. <sup>3</sup>Allah diba tenena ati, nun ap, du weit atonun unyak nang arye, an ulalum ning ati yanuka laka nyapnike. Sikce nyapnik. “Gaius bira, Allah el

dipkoprop yupu fia batakna kumce, talina uk ulule. Tonda, Allah yupu nyasilye touk, Gaius moubuka kekelirye, aning uk talibuka telebuk ulule,” nyabuka an ti nyapnikba, na weik kanye deipkise. <sup>4</sup>Na Yohanes arye, peterelamsibuk, diba tenebik ninye ati, “Aninye ara, Allah yupu nyasilye touk, moubuka kekenyakce, fia teleb ubuka unyake,” yuk nang arye, nyapkikbuk kekenun ara, fia kanye teleb delinune. Yuk teleb kanye delinin ning ara, mitik uka. Weik ning ara, atonoka.

<sup>5</sup>Na ka, kanye delikunune. Ara, sik diba tenebikce, nun du weit atonun unyak nang ara, an ton minopce kum elilyame. Tonda, anang kum kel kiyamlum bukni, sik anang melina ati, batakna kumce, fil tuba dominya ara, telebuk winilyame. <sup>6</sup>Ance sik ti, bico tenebuka melilamlum ning ara, sikce yuk Allah diba tenebik nang nirya ati, laka nyakinyake. Allah el bidamnye, nun unyabak yasutu ura, meliptibye touk, anang babye ati, teleb ubuka melipmince, sik binamak ak, “Telebe, dabilulume,” nyabuka, melibuka dokwetepminyop ura, aning ara telebuka. Yuk diba tenen, nang melipminyop ura, ara mitikanun Allah el bidamnye ati melina atouk winilyama ati nyapkine.

<sup>7</sup>Diba tenena kum ninye arye, anang ati kum melilamikbuk, ‘Yesus el si deice arye fil donamap’ tenen, sik mutuku koprop batakuka, Yesus el ninye lyena ati, laka teleb yupu peterelbana ati, yuk mutuku fil dopra balamika ani, tuba afil uk dopra banyake. <sup>8</sup>Aning ati ara, ‘Aning nirya nun ap, arye, ansinibuka fil melibuka doptibnyop ura, yuk ninye babye ton, Allah el dipkoprop yupu kekepnamak,’ tenena ati, ato nang melinamabe. Anang ara, sik pataplye ning nirya ati, milina uk unamabe. Ara, din ning do, aik manak do, aning nirya ati, milina uk unamabe.

<sup>9</sup>Ara, yuk ning ton nyapnune. ‘Anggun Allah diba tenelulum ninye nirya kekepnamlum’ tenen, surat sekeipsise bukni, tonoknye el si Diotrepes ara, yuk nang arye na ti, ‘Elda fia weiknye ulule tenepnamniake’ tenen, fia patalibuk, nun yupu kum kekesulule. Elce nun ti, ‘Sik yuk,’ tenesulule.

<sup>10</sup>Aning ati ara, na arye an dam yatinye do, el Diotrepes ati, “El ulul ning nirya ani,” nyabuka lak akarye nyapnamne. Ara, elce nun ti, ‘Yuk nang arye Yohanes ap, el mapu silip ap ati, malye tenepnamak’ tenen, elce yu ubuka, minina yupu nyasulula ati, nyapkine. Tonda, aning uk kume. Diotrepes arye, nun du weit atonun unyap ninye ati, “Telebe,” nyabuka, fia kum yuk ululce, tonda fia kum melisulule. “Na kume, Yesus diba tenenyak ninye ara, na arye kum melinamne,” nyalule. Tonda, yuk nang arye, ‘Kume, anang ara, nun du weit atonun unyaka anya arye, nuncuk, “Telebe,” nyabuka melipnamabe,’ tenenyak nang ati ara, Diotrepes arye, ‘Na mutuku nang arye, yukubicak’ tenen, “Anggun batakululume,” nyabuka yupu sekelongolule. Winilirye, “Allah yupu aik tonap, kum wekenamlulume,” nyabuka, nun ti melipmanto unyak nang ati, batakalulce yupu sekelule.

<sup>11</sup>Na kwit Gaiuso, malye winin ning ara dipdemince, leibuka yukak unamlyame. Malye winin nang arye winilamak touk, anda fia kum wininamlyame. Malye winin ning kum bukni, teleb winin ninguk eibuka aning uk wininamlyame. Yata nang do nirya, teleb ubuka funguk wininyak ninye ara, Allah ap, ansinibuka unyakce, Allah el mapu unyake. Sik malye-malye wininyak ninye ara, Allah ati moubuka kum kel kiyamika ati, el winilul ning moubuka kum tenenyake. Tonda, diba kum tenenyake, nyapne. <sup>12</sup>Yuk ning ton nyapnune. Yuk ninye nirya arye, nun kwit Demetrius ati, “Elda telebuk ulule,” nyabuka nyanyake. Tonda, Allah yupu nyasilye touk ululnye anya arye, Allah yupu deice arye ton, ‘Demetrius bira, telebuk ulule,’ tenenyabe. Atouk ton, nun babye, el ti, “Teleb uk winilule,” nyanyabe. Aning ara, talye kum nyanyabe. Tonda, anggun kele, nunce nyalamap yupu nirya ara, dipkoprop uk nyanyabe.

<sup>13</sup>Ara, yupu weiktonun aupmanila ara, surat jang ning arye seksitinye bukni, kertas ap, sekna ning tinta bolpen ap, deice arye sekuka kum nyapnusine. <sup>14</sup>Deiyok ara, ani. ‘Anggun dam yanirye, sik nong ton eipnamsine,’ tenebuka patanulul ati, anggun dam yanamne talak ara, neika bukibirye yupu sisikinamabe. Ati akunuma, ‘Anggunda teleb kanye uk bonamlulume’ tenen, Allah morosunune. Anggun kayapu, na dam amutuku unyak ninye arye, anggun ti, “Telebe,” nyasilyake. Tonda, anggun dam unyak nang, nun kayapu, anggun mutuku noutamak unyak ninye ati, anggun si yuk-yuk sisibuka, “Yohanes arye, anggun ti telebe nyapsile,” nyabuka anang ati nyapdeipnamsilyame.

Telebe na Yohanes arye akunum nyapne.